



Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 30/09/2025

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Wunnengsbau weiderzeleden.

Wéi aus de Medieberichter ervirgeet, melle Studente, déi am Galileo Gebai um Belval wunnen, "onmënschlech" Zoustänn an hire Wunnengen. Dës Problemer, déi ënner anerem Stroumausfäll, Schimmel an Iwwerschwemmunge mat Exkrementer enthalen, bestinn trotz héije Loyer an iwwer eng méi laang Zäit, an déi betraffene Servicer (wéi Stroum a Waasser) sinn Deel vum Locatiounskontrakt. D'Situatioun ass besonnesch prekär, well et sech haaptsächlech ëm international Studenten handelt, déi op dës Wunnengen ugewise sinn.

De Quartier Belval, wou dëst Gebai steet, gouf vun der AGORA entwéckelt, enger Struktur, déi an engem Partenariat Public-Privé funktionéiert an un där de Lëtzebuerger Staat zu 50% bedeelegt ass. Dës staatlech Bedeelegung am Entwécklungsberäich vum Belval bréngt eng speziell Verantwortung mat sech, och wat d'Qualitéit vum Liewen an de Wunnengen ugeet, déi an dësem ëffentlech mat-entwéckelte Quartier entstinn.

An deem Zesammenhang wéilt ech dem Minister dës Froe stellen:

1. Wat ass déi genee Roll vun der AGORA S.à r.l., respektiv vum Lëtzebuerger Staat a sengen Associéien, bei der Iwwerwaachung vun de Wunnengsqualitéiten an de Servicer a Gebaier, déi an deem vun hinnen entwéckelte Quartier Belval realiséiert goufen?
2. Wien ass Besëtzer vun de Parzellen op deenen d'Gebai steet?
3. Ass d'Regierung bereet, e spezifesch Mechanismus opzestellen, deem d'Qualitéit an d'Hygiènesnorme vu Loyer-Wunnenge fir vulnerabel Gruppen (wéi Studenten oder



Saisonsarbechter) garantéiert an duerchsetzt, onofhängeg vum Besëtzer vum Gebai?

4. Ass d'Gebai an deem d'Problemer opgetruede sinn, iwwer de Wee vun engem staatleche Subside (z.B. Zënsbäihëllef, TVA-Taxe, Investitiounshëllef oder indirekt Subventiounen) bei sengem Bau oder fir seng Nutzung als Studentewunneng ënnerstëtzt ginn, a wa jo, ëm wéi eng Zomm an ënner wéi enge Konditiounen?
5. Wéi kann d'Regierung oder d'Uni déi betrafte Studente beim Ufroe vun enger Loyer-Reduktioun oder bei de juristesche Schrëtt ënnerstëtzen? Dëst och well den Accueil vun internationale Studéierenden Deel vun eiser Visittekaart ass?

Mat déiwem Respekt,



CLEMENT Sven
Deputéierten

